

ԻՐԱՆԻ ԱԶԳԱՅԻՆ ԲՈՒՐժՈՒԱԶԻԱՅԻ ԿԱՌԱՎԱՐՈՒԹՅԱՆ ՆԵՐՔԻՆ
ՔԱՂԱՔԱԿԱՆՈՒԹՅՈՒՆԸ (1952—1953 թթ.)

ԱՆՈՒՇ ՍՏԱՄՐՈՒՑՅԱՆ

Համաշխարհային երկրորդ պատերազմին հաջորդող տարիներին Իրանում ծավալված ազգային-ազատագրական պայքարի շնորհիվ 1951 թ. ապրիլի 29-ին իշխանության գլուխ անցավ Մոհամմեդ Մոսադեղի գլխավորած ազգային բուրժուազիայի կառավարությունը:

Ազգային բուրժուազիայի կառավարման ժամանակահատվածը (1951—1953 թթ.) ետպատերազմյան տարիներին Իրանական ժողովրդի ազգային-ազատագրական շարժման կարևորագույն փուլերից մեկն է, որի համակողմանի լուսաբանման նշանակությունը չափազանց մեծ է այդ շարժման ամբողջական ընկալման և ճիշտ գնահատման համար: Իրանի նորագույն պատմության այս կարևոր շրջանը հետազոտողներին առավելապես գրավել է նավթային պրոբլեմի տեսակետից: Պատճառը, թերևս, ըմբռնելի է, եթե նկատի առնենք, որ Մոսադեղի գործունեության առաջնահերթ նպատակը, իրոք, նավթարդյունաբերության ազգայնացման օրենքի իրականացումն էր, շնորհիվ որի նա ակնկալում էր ապահովել Իրանի տնտեսական և քաղաքական անկախությունը¹:

Նավթային հարստություններն Իրանին վերադարձնելու համար տևական և անզիջում պայքարին զուգընթաց, ազգային բուրժուազիայի կառավարությունը վարում էր ուշագրավ ներքին քաղաքականություն, որի քննությունը հավասարապես կարևոր է վերը հիշված խնդիրների պարզաբանման համար:

Ազգային բուրժուազիայի կառավարության ներքին քաղաքականությունը քննելիս անհրաժեշտաբար հարկ է սահմանադատել միմյանցից որակապես զանազանվող երկու հիմնական փուլ: Իշխանության սկզբնական շրջանում կառավարության ջանքերն ուղղված էին նավթարդյունաբերության ազգայնացման օրենքի իրականացմանը, հանգամանք, որն ինքնըստինքյան բացառում էր երկրի ներքին կյանքի որևէ բնագավառում նրա լիարյուն գործունեության հնաժամորոշությունը: Կառավարության ներքաղաքական գործունեությունն անհամեմատ բազմաբովանդակ և առավել ամբողջական դարձավ իշխանության երկրորդ փուլում, երբ Մոսադեղին ասպարեզից հեռացնելու տեղական հետադեմ ուժերի և օտարերկրյա իմպերիալիստների համատեղ փորձի անհաջողությունից հետո՝ 1952 թ. հուլիսի 22-ին, նա վերագրավեց իշխանությունը²:

1952 թ. հուլիսի 27-ին Մոսադեղը մեջլիսի հաստատմանը ներկայացրեց իր երկրորդ կառավարության ծրագիրը³, որի բովանդակությունն աներկբայո-

¹ «اسناد نفت»، تهران، ۱۳۳۱، ص: ۹۱

² «کيهان»، 22.VII.1952.

³ «اطلاعات»، 27.VII.1952.

րեն ցուցադրում էր ազգային բուրժուազիայի աշխարհայացքում, նաև քաղաքականության մեջ կատարված առաջադիմական տեղաշարժերը և վկայում էր նավթային սպասվող եկամուտներից անկախ, երկրի ներքին կյանքի գրեթե բոլոր բնագավառներում տիրող անսպիտակ վիճակը հնարավորին չափ բարելավելու Մոսադեզի հաստատ մտադրության մասին:

Ծրագրում ընդարձակ տեղ էր հատկացված երկրի կազմավորված տնտեսության վերականգնմանը⁴: Առանց այն էլ թույլ զարգացած և նախորդ կառավարությունների քաղաքականության հետևանքով էլ ավելի քայքայված ազգային արդյունաբերությունը խթանելու նպատակով կառավարությունն ընտրեց երկու ճանապարհ:

1. Գործող արդյունաբերական ձեռնարկությունների ընդարձակում և նոր ձեռնարկությունների հիմնում:

2. Տարբեր պատճառներով շարքից դուրս եկած կամ փակված ձեռնարկությունների վերականգնում և վերաբացում:

Տնտեսական ծրագիրը կենսագործելու համար կառավարության կողմից տրամադրվող 50 մլն. դոլլար գումարից 31 մլն. դոլլարը նախատեսվում էր հատկացնել շաքարի, թեյի, տեքստիլ և հանքարդյունաբերական ձեռնարկությունների զարգացմանն ու ընդարձակմանը⁵, շնորհիվ որի Մոսադեզը հույս ուներ ոչ միայն էականորեն բարվոքել երկրի տնտեսական վիճակը, այլև կրճատել երկրի վալյուտային ծախսերը: Նման քաղաքականությունն, անտարակույս, մեծապես կնպաստեր նաև մեկ այլ՝ ազգաբնակչությանն աշխատանքով ապահովելու սուր պրոբլեմի մեղմացմանը:

Երկրի արդյունաբերության վիճակի բարելավմանը նպաստող նշանակալի միջոցառում էր արդյունաբերական հատուկ կազմակերպության («սազման-հ սանահ») հիմնադրման մասին օրենքի հրապարակումը⁶: Կազմակերպությունը հիմնականում համաձայնեցնելու և պլանավորելու էր պետական ձեռնարկությունների գործունեությունը՝ նրանց արտադրական հզորության առավելագույն օգտագործման և արտադրանքի ծավալն ընդարձակելու նպատակով, ինչպես նաև միջոցառումներ էր մշակելու ազգային արտադրության ապրանքների տեսականին ավելացնելու ուղղությամբ:

Երկրի տնտեսությունն օտարերկրյա կախումից ազատագրելու և նրա ինքնուրույն զարգացման համար պայմաններ ապահովելու, ինչպես նաև ազգային քաղաքականության բուրժուազիայի դիրքերն ամրապնդելու՝ կառավարության քաղաքականության ուղղակի արտահայտություններից էր «Հանքային հարստությունների մասին» օրենքը, որը ստորագրվեց 1952 թ. դեկտեմբերի 24-ին⁷:

Համաձայն այդ օրենքի, երկրի հանքային բոլոր հարստությունները ստորաբաժանվում էին երեք խմբի: Երրորդ խմբի հանքանյութերի (նավթամթերքներ, բնական գազեր, ռադիոակտիվ տարրեր) մշակման մենաշնորհը տրվում էր պետությանը: Օրենքը, միաժամանակ, սահմանում էր մասնավոր ձեռնարկությունների իրավունքները և դրանց արդյունաբերական կոնցեսիա-

⁴ Նույն տեղում:

⁵ «اطلاعات», 25.VIII.1952.

⁶ «روزنامه رسمی کشور شاهنشاهی ایران», 1.IV.1953.

⁷ «اطلاعات», 27.XII.1952.

ներ տրամադրելու պայմաններ էր որոշում: Ազգային արդյունաբերության վերականգնման ուղղությամբ կառավարության միջոցառումները չնայած հեռու էին բավարար լինելուց և այլևայլ պատճառներով լրիվ չիրականացվեցին, ալդուհանդերձ դրականորեն ազդեցին արդյունաբերության մի շարք ճյուղերի զարգացման վրա: Համաձայն պաշտոնական վիճակագրության, 1950 թ. համամատուցյալ 1953 թ. 44 հազ. տոննայով ավելացավ շաքարի արտադրությունը, 11 հազ. տոննայով՝ ցեմենտինը: Զգալիորեն աճեց նաև գորգերի և գլանակների արտադրությունը⁸, ընդարձակվեց որոշ հանքանյութերի արդյունահանումը⁹:

Նպատակ ունենալով զարգացնել երկրի գյուղատնտեսությունը և բարձրացնել գյուղացիության վիճակը, ազգային բուրժուազիայի կառավարությունն այդ ուղղությամբ որոշակիորեն կարևոր քայլեր ձեռնարկեց: Արդեն 1952 թ. հունիսի վերջերին Մոսադեղը մի հարցազրույցի ժամանակ հայտարարեց, որ «չանալու է վերջ դնել գյուղացու վրա կալվածատերերի կողմից գործադրվող ճնշողումներին»¹⁰, Զփորձելով իսկ (և ի վիճակի էլ չլինելով) իրականացնել այդ ավելի քան հավանոտ խոստումը, Մոսադեղը, այնուամենայնիվ, արդեն 1952 թ. հոկտեմբերի 12-ին հրապարակեց «Գյուղերում պարհակները վերացնելու մասին» օրենքը¹¹, որն ակնհայտորեն ուղղված էր կալվածատերերի կամայականությունների սահմանափակմանն ու գյուղացու շահագործման մեղմացմանը: Խոշոր հողատեր-կալվածատերերի դեմ էր ուղղված նաև «Գյուղացու բաժնի ավելացման և գյուղատնտեսական բարեկարգող կազմակերպություն հիմնելու մասին» օրենքը¹²: Այն նախատեսում էր կրճատել բերքից կալվածատիրոջ հասանելիքի, ինչպես նաև նրա մյուս եկամուտների 20%-ը, որի 10%-ը բաժանվելու էր հողը մշակող գյուղացիներին, իսկ մյուս 10%-ը տրամադրվելու էր գյուղական շրջանների բարեկարգման նպատակով հիմնվելիք մարմիններին: Համաձայն այդ օրենքի, կազմակերպվելու էին գյուղական, շրջանային և նահանգային խորհուրդներ, որոնք և տնօրինելու էին կալվածատիրոջ հասանելիքի 10%-ը, և որոնց կազմում գյուղացիներն ունենալու էին պատշաճ թվով ներկայացուցիչներ: Չնայած թերություններին, վերոհիշյալ օրենքն ուներ սոցիալ-տնտեսական կարևոր նշանակություն: Գյուղացու կենսավիճակի թեկուզ չնչին բարելավումը, բնականաբար, կնպաստեր նրա աշխատանքի առավել արդյունավետությանը, գյուղատնտեսական արտադրանքի ծավալի և գյուղատնտեսական հումքի արտահանության ընդարձակմանը: Ազրարային հիշատակված օրենքների իրականացումից Մոսադեղի առաջնահերթ ակնկալությունը, սակայն, գյուղացիների դրությունն ինչ-որ չափով բարելավելու միջոցով նրանց դժգոհությունը մեղմելն էր, նրանց ընդվզումները զրուպելը և, որ ամենակարևորն է, գյուղացիական զանգվածների շրջանում հեղինակություն վաստակելն ու ամուր դիրքեր ապահովելը: Նույնպիսի նպատակներ էր հետապնդում նաև «Գյուղատնտեսական բանկի կանոնադրության մա-

⁸ «Economic Developments in the Middle East», 1954—1955, New-York, 1956. p. 33.

⁹ «Зарубежные страны», М., 1957, стр. 390.

¹⁰ «کمیون»، 28.VII.1952.

¹¹ Նույն տեղում, 13. VIII. 1952.

¹² Նույն տեղում, 14 և 16. VIII. 1952.

սին» օրենքը¹³, որն ուղղված էր ամեն կերպ աջակցելու գյուղում Մոսագեղի հիմնական հենարանը հանդիսացող միջին խավի՝ խորդեմալեքների և կոռպ-րացնող ընկերությունների գործունեությանը 1952 թ. օգոստոսին գյուղա-տնտեսության մինիստրությունը կառավարությանը ներկայացրեց ոռոգման և ամբարտակների կառուցման ընդարձակ ծրագիր, որը կենսագործվելու էր երևք տարում և որի վարկավորման համար նախատեսվում էր տրամադրել 1 մլրդ. 19 մլն. ռիալ¹⁴, Նշված միջոցառումների շնորհիվ, զգալիորեն մեծացավ գյուղատնտեսական արտադրանքի ծավալը 1952 թ. համեմատությամբ 1953 թ. 380 հազ. տոննայով ավելացավ ցորենի արտադրությունը, 182 հազ. տոննայով՝ շաքարի ճակնդեղինը՝ Նկատելիորեն աճեց բրնձի, բամբակի, զարու և այլ կուլտուրաների արտադրանքը¹⁵:

Հավատարիմ իրանի համար ինքնուրույն զարգացման հնարավորություն ապահովելու իր քաղաքականությանը, իշխանության երկրորդ փուլում ազգային բուրժուազիայի կառավարությունը գործնական քայլեր ձեռնարկեց երկրի արտաքին առևտուրն օտարերկրյա ստրկական կախումից ազատագրելու ուղղությամբ 1952 թ. սեպտեմբերի 25-ին կառավարությունը հրապարակեց «Արտահանության խրախուսման և արտաքին առևտրի լիցենզիաներ տալու մասին» օրենքը¹⁶, որը, մասնավորապես արտահանվող ապրանքները բազմա-տեսակ հարկերից ազատելու, նրանց փոխադրման հետ կապված ծախսերը կրճատելու և նորաստեղծ արտահանող ընկերություններին արտոնություններ տրամադրելու միջոցով նպատակ ունեւ դուրացնել և ընդարձակել տեղական արտադրանքի արտահանությունը: Արտահանվող ապրանքները լավագույն ձևով ներկայացնելու և արտահանությունն աշխուժացնելու դիտավորությամբ ազգային տնտեսության մինիստրությունը ձեռնարկեց տնտեսական ներկայացուցչություններ և գործակալություններ հիմնել այն երկրներում, որոնց հետ իրանը մտադիր էր առևտրական հարաբերություններ հաստատել¹⁷: Արտաքին առևտրի բնագավառում ազգային բուրժուազիայի կառավարության ձեռնարկած նշանակալի միջոցառում էր նաև երկրի գրեթե բոլոր խոշոր քաղաքներում «առևտրի պալատների» («օթադհա-ե բազերդանի») հիմնումը: Վերջիններս կազմակերպվում էին «վաճառականներին համախմբելու և նրանց նախաձեռնության ուղղություն տալու, իրանի և այլ երկրների միջև առևտրական կապեր հաստատելու և՛ ընդլայնելու, վաճառականական ընկերությունների, ինչպես նաև առևտրա-տնտեսական ձեռնարկությունների և ազգային տնտեսության մինիստրության միջև սերտ համագործակցություն հաստատելու նպատակով»¹⁸: Արտաքին առևտուրը կարգավորելու նպատակ էր հետապնդում նաև 1953 թ. հունվարի 22-ին կառավարության հրապարակած օրինագիծը՝ «Մաքսանենգների դեմ պայքարելու համար միջոցառումներ ձեռնարկելու և

¹³ «روزنامه رسمی کشور شاهنشاهی ایران», 1.VII.1953.

¹⁴ «اطلاعات», 19.VIII.1952.

¹⁵ «Economic Developments in the Middle East», p. 140.

¹⁶ «روزنامه رسمی کشور شاهنشاهی ایران», 25.XII.1952.

¹⁷ «اطلاعات», 2.VIII.1952.

¹⁸ «روزنامه رسمی کشور شاهنشاهی ایران», 1.I.1953.

ներանգ բացահայտողներին խրախուսելու մասին¹⁹։ Արտաքին առևտրի բնագավառում կառավարության հռչակած գործունեությունը դրական արդյունքներ տվեց։ Իրանի ազգային բանկի վիճակագրության համաձայն՝ արդեն 1952/1953 թթ. Իրանի արտաքին առևտուրը ձերբազատվել էր արտահանության և ներմուծության միջև առկա մշտական ճեղքվածքից և ուներ աննախագիշտ դրական սալդո (ներմուծում՝ 5031525 հազ. ուրալի, արտահանում՝ 5800303 հազ. ուրալի, սալդո — 768778 հազ. ուրալի)²⁰։

Ազգային բուրժուազիայի կառավարության քաղաքականության մեջ դիտվող աստիճանական առաջադիմական տեղաշարժերն առավել ակնբախ դարձան նրա իշխանության ամենավերջին շրջանում։ Տնտեսության և, մասնավորապես, արտաքին առևտրի բնագավառում դրանց լավագույն արտահայտությունը եղավ սոցիալիստական երկրների և, հատկապես, Սովետական Միության հետ առևտրական հարաբերությունների հաստատումը, որը նշանավորվեց 1953 թ. հունիսի 10-ին առևտրական պայմանագրի կնքմամբ²¹։

Արտահայտելով իր կարծիքը պայմանագրի մասին, Իրանի տնտեսության մինիստր Ախավին առանձնապես ընդգծում էր, որ ՍՍՀՄ-ի և Իրանի միջև կլիրինգյան հիմունքներով ապրանքափոխանակության ծավալի ընդարձակումը մեծապես կնպաստեր իրանական վալյուտայի արտահոսքի կանխմանը²²։ (պայմանագիրն Իրանին հնարավորություն էր տալիս տարեկան 1,110 մլն. ուրալի վալյուտա խնայել)²³։ Եվ ապա, որ երկու երկրների տարածքային մոտիկությունը չէր պահանջի փոխադրական մեծ ծախսեր և, անկասկած, բարերար ներգործություն կունենար ապրանքների գների վրա։ Գնահատելով նոր պայմանագրերը, «Քեյհանն» իրավացի հույս էր հայտնում, որ իրանա-սովետական առևտրի ընդարձակումը զգալիորեն կմեղմեր Իրանի առևտրի բնագավառում առկա ճգնաժամը²⁴։

Կառավարության այսպիսի քաղաքականության շնորհիվ Իրանի տնտեսական վիճակի բարվոքումը կնպաստեր նաև երկրի ֆինանսների կարգավորմանը, որոնք, սակայն, շարունակում էին մնալ ծանր դրության մեջ։ Պատճառը ոչ միայն այն էր, որ կառավարությունը դեռևս անհրաժեշտ միջոցառումներ չէր իրականացրել ազգայնացված նավթի հանույթը, մշակումն ու վաճառքը կազմակերպելու ուղղությամբ և դարձյալ զրկված էր դրա եկամուտներից²⁵ և ոչ էլ միայն ֆինանսների բնագավառում ձեռնարկված միջոցառումների անարդյունավետությունը, այլև այն, որ դեռևս թույլատրվում էր Միացյալ Նահանգներից «օգնություն» ստանալու ավանդական քաղաքականությունը։

¹⁹ «اطلاعات», 22.1.1953.

²⁰ „Bulletin Bank Melli Iran“, № 134, May, 1953, p. 125.

²¹ «باختر امروز», 10. VI. 1953.

²² «کيهان», 16.VI.1953.

²³ «Правда», 14. VI. 1953.

²⁴ «کيهان», 13.VI.1953.

²⁵ Պաշտոնական տվյալների համաձայն՝ 1952 և 1953 թթ. Իրանում նավթի տարեկան հանույթը 1.400.000 տոննա էր (1950 թ.՝ 31.750.000 տոննա)։

Իշխանության երկրորդ փուլում ազգային բուրժուազիայի կառավարությունը աշխույժ գործունեություն ծավալեց նաև երկրի ներքին կյանքի այլ բնագավառներում:

Արտակարգ լիազորություններ ստանձնելուն պես Մոսադեզը ձեռնամուխ եղավ ընտրական օրենքը բարեփոխելու իր վաղեմի մտադրության իրականացմանը²⁶: Ընտրական նոր օրենքը, որը հրապարակվեց 1952 թ. դեկտեմբերի 17-ին²⁷, թեպետ հավակնում էր ապահովել բոլոր ընտրողների իրավահավասարությունը և գործնական միջոցառումներ էր մշակում ընտրությունների ընթացքում հնարավոր կեղծիքներից խուսափելու համար, այնուամենայնիվ, զերծ չէր լուրջ թերություններից. օրենքը կանանց դարձյալ ղրկում էր ընտրական իրավունքից: Նոր օրենքի համաձայն, դեպուտատության թեկնածուները պարտավոր էին 20 հազ. ուիլ վճարել պետությանը: Սահմանված դրամական ցենզը, անշուշտ, ինչ-որ չափով սահմանափակում էր մեղիսում շունեոր առաջադեմ խավերի ներկայացուցիչների ընտրվելու հնարավորությունը: 1952 թ. սեպտեմբերին հրապարակվեց «Քաղաքային և ավանային խորհուրդների ընտրության և քաղաքային վարչությունների անկախության մասին» օրենքի նախագիծը²⁸, որը նկատելիորեն ընդլայնում էր իշխանության տեղական մարմինների իրավասությունների շրջանակները:

1952—1953 թթ. ազգային բուրժուազիայի կառավարությունը ձեռնարկեց մի շարք միջոցառումներ, որոնք անմիջապես ուղղված էին երկրի արդարադատության սխտեմի բարենորոգմանը: 1952 թ. սեպտեմբերին արդարադատության մինիստրությունը հրապարակեց երկու օրինագիծ, որոնք շուտով օրենքի ուժ ստացան: Օրինագծերից առաջինը վերաբերում էր դատավորներին աշխատանքի ընդունելու մասին օրենքի բարեփոխմանը²⁹, որի իրականացման դեպքում կառավարությունը հնարավորություն կստանար պաշտոնազրկել արդարադատության ոլորտում հետադիմական շրջանների դրածոներին: Արդարադատության մինիստրության հրապարակած մյուս օրինագիծը իրանում դեռևս գործող հատուկ դատարանները վերացնելու մասին էր³⁰: Կառավարության կողմից այդ դատարանների վերացումն արդեն իսկ առաջադիմական քայլ էր, որովհետև երկրի արդարադատության սխտեմը դառնում էր կուռ ու միասնական, իսկ դատարանների գործունեությունը՝ առավել անկախ. բացի այդ, օրինագիծը զգալիորեն սահմանափակում էր դատավորների կամայականությունների և կաշառակերության հնարավորությունը: 1952 թ. նոյեմբերի 16-ին պրեմիեր-մինիստրի հաստատմանը ներկայացվեց «Գերագույն դատարանը և դատական կոլեգիայի կողմից օրինականության խախտումները քննող դատարանը վերացնելու մասին» օրենքի նախագիծը³¹: Օրենքն արդարադատության մինիստրությանը պարտավորեցնում էր շուտափույթ կերպով լուծարել

²⁶ Ընտրական օրենքի վերափոխումը նախատեսվում էր դեռևս Մոսադեզի առաջին կառավարության ծրագրով: Իշխանության առաջին շրջանում. սակայն, նրա իրագործման ուղղությամբ որևէ քայլ չձեռնարկվեց:

²⁷ «اطلاعات», 17.XII.1952.

²⁸ Նույն տեղում, 6. IX. 1952:

²⁹ Նույն տեղում, 20. IX. 1952:

³⁰ Նույն տեղում:

³¹ «اطلاعات», 16.XI.1952.

ալդ դատարանների բաժինները և փոխել դրանց ղեկավարների ու աշխատակիցների կազմը: Այդ ճանապարհով կառավարությանը կհաջողվեր հիշյալ դատարաններում ներգրավել իրեն նվիրված անձանց առավել մեծ քանակ: Չնայած արդարադատության բնագավառում կառավարության այս և մյուս միջոցառումները կիսատ-պուտ էին ու սահմանափակ, այդուհանդերձ նրանց իրականացումը երաշխավորում էր արդարադատության սիստեմի գոնե մասնակի բարեփոխություն, բուրժուա-դեմոկրատական իրավունքների ապահովում:

Դեռևս 1952 թ. օգոստոսին Մոսադեղի անմիջական նախաձեռնությամբ ստեղծվեց հատուկ հանձնաժողով, որին հանձնարարված էր նախապատրաստել երկրի առողջապահության վիճակը բարելավելու ունակ նախագիծ³²: Այդ նախագիծը, որ կարճ ժամանակում մշակվեց և որպես օրինագիծ ներկայացվեց պրեմիեր-մինիստրի հաստատմանը, էական բարեփոխություններ էր նախատեսում առողջապահության գրեթե բոլոր բնագավառներում³³: Դարձյալ Մոսադեղի ցուցումով, 1953 թ. փետրվարի սկզբներին, կազմակերպվեց մեկ այլ հանձնաժողով, որի ուղղակի պարտականությունը ուսուցիչների աշխատանքը խրախուսելու նպատակով նրանց աշխատավարձի չափերի սահմանումն էր և ժողովրդական կրթության ասպարեզում բարեփոխություններ անցկացնելու ուղղությամբ օրենքների մշակումը³⁴: 1953 թ. պետական բյուջեով նախատեսվում էր ավելացնել առողջապահության և լուսավորության նպատակների հատկացումները³⁵:

Նրբ իրանի ազգային բուրժուազիան իշխանությունն իր ձեռքը վերցրեց, արքունիքը դեռևս մնում էր իշխանության հիմնական կենտրոնը և շահը հսկայական տիրապետող դեր ունեւր երկրի քաղաքական կյանքում: Այդ հանգամանքը ժայռաստիճան սահմանափակեց ազգային բուրժուազիայի կառավարության գործունեության շրջանակները և, փաստորեն, նրան զրկեց լիակատար ինքնուրույն քաղաքականություն վարելու հնարավորությունից: Շահի նկատմամբ Մոսադեղի քաղաքականությունը հիմնվում էր «շահը պետք է լիազավորի և ոչ իշխի»³⁶ սկզբունքի վրա, որի նպատակը միմիայն շահի իշխանության սահմանափակումն էր և ոչ միապետության ընդհանրապես վերացումը, ինչպես փորձում է ներկայացնել բուրժուական պատմագրությունը: Մոսադեղը ոչ միայն հանրապետություն հաստատելու որևէ դիտավորություն չէր հետապնդում, այլև շահի նկատմամբ նրա քաղաքականությունը իշխանության ողջ շրջանում խիստ վարանոտ էր և անվճռական: Օպոզիցիայի օրըստօրե սաստկացող դիմադրությունը զսպելու և իր իշխանությունը պահպանելու համար Մոսադեղին կենսականորեն անհրաժեշտ էր իր ձեռքում կենտրոնացնել մինչ այդ արքունիքի կատարյալ ենթակայության տակ գտնվող ռազմական ուժերը: Մոսադեղի այս պահանջը, սակայն, տիրող շրջանների կողմից դարձյալ ընկալվեց որպես շահին իշխանությունից մեկուսացնելու ուղղակի սպառնալիք և հանդիպեց այնպիսի բուռն հակադեմոկրատական, որ Մոսադեղը

³² Նույն տեղում, 25. VIII. 1952:

³³ Նույն տեղում:

³⁴ Նույն տեղում, 2. II. 1952:

³⁵ Նույն տեղում, 24. V. 1952:

³⁶ L. Binder, Iran, Political Development in a Changing Society, Berkeley and Los Angeles, 1962, p. 94.

ստիպված էր հրաժարական տալ³⁷, Սակայն ժողովրդական լայն զանգվածների անձնագործ պայքարի ու աջակցության շնորհիվ իշխանության գլուխ վերադառնալուց և արտակարգ լիազորություններ ու ռազմական միջոցների պաշտոնը ձեռք բերելուց հետո ևս, Մոսադեղի անհետևողականության պատճառով, բանակի գործերին շահի ամենագործոն միջամտության հնարավորությունը չվերացավ, քանի որ բանակի ղեկավարությունը թողնվեց հետադեմ տարրերի ձեռքին: Այս պարագայում զարմանալի չէ, որ Մոսադեղի կողմից իշխանությունը վերագրավելուն պես նախկին պաշտոններին մնացած միապետական սպաները վերսկսեցին իրենց դավադիր գործունեությունը, որի ակնհայտ դիտավորությունը Մոսադեղին վերստին տապալելն էր³⁸:

Կառավարման երկրորդ փուլում Մոսադեղի ողջ քաղաքականությունը և, մասնավորապես, իր իշխանությունն ամրապնդելու ուղղությամբ նրա վճռական ձեռնարկումները, որոնք գերակշռաբար բախվում էին արքունիքի շահերին, է՛լ ավելի սրեցին շահի հետ նրա փոխհարաբերությունները: 1953 թ. փետրվարի 28-ին շահն իրանից հեռանալու փորձ արեց³⁹, Ընդ որում, իրերի գրությունն այնպես էր ներկայացվում, որ, իբր, շահն իրանը թողնում է Մոսադեղի ճնշման ու հարկադրման հետևանքով: Այսպիսի պատճառաբանությունը կարող էր ճշմարտակերպ հնչել, եթե հիշենք նաև, որ այդ իրադարձությունն անմիջապես հաջորդում էր վերջին շրջանում Մոսադեղի մի շարք այնպիսի միջոցառումներին, որոնք ուղղակիորեն սահմանափակում էին շահի իշխանությունը: Այսպես, 1953 թ. հունվարի 10-ին Մոսադեղը մեջլիսից պահանջեց ևս մեկ տարով երկարաձգել իրեն տրամադրված արտակարգ լիազորությունների ժամկետը⁴⁰, Հունվարի 19-ին մեջլիսը նրա այդ պահանջը բավարարեց⁴¹: Գրեթե միաժամանակ Մոսադեղը սկսեց գործնական քայլեր կատարել բանակում իր ազդեցությունն ամրապնդելու ուղղությամբ, որն առաջին հերթին արտահայտվեց արքունիքի հետ սերտորեն կապված որոշ բարձրաստիճան սպաների պաշտոնազրկմամբ: Մոսադեղը նաև մեջլիս առաջարկություն մտցրեց բռնագրավել ու պետականացնել շահի կալվածքները և դրանից սպասվող եկամուտներն ի սպաս դնել իրանի տնտեսության ֆինանսավորմանը⁴²: Փետրվարի վերջերին արդեն շահի և Մոսադեղի փոխհարաբերություններն այնքան էին սրվել, որ կազմվեց մեջլիսի յոթ ներկայացուցիչներից բաղկացած հանձնաժողով՝ նրանց միջև ծագած տարաձայնությունները քննելու համար⁴³, Այսպիսի պահին իրանից մեկնելու մասին շահի վճիռը, այն էլ վերը հիշատակված պատճառաբանությամբ, նպատակ ունեւր Մոսադեղին վարկազրկել հասարակության աչքում, որոշակի խավերի գրգռել և ոտքի հանել նրա դեմ՝ ի պաշտպանություն շահի և, վերջապես, համապատասխան իրադրություն նախապատրաստել պետական հեղաշրջման համար: Այնուամենայն-

³⁷ «اطلاعات», 17.VII.1952.

³⁸ «ستاره», 4.VIII.1952.

³⁹ «اطلاعات», 28.II.1952.

⁴⁰ Նույն տեղում, 10. I. 1953.

⁴¹ Նույն տեղում, 19. I. 1953.

⁴² W. E. Warner, Mission for Peace. Point 4 in Iran, New York, 1956, p. 242.

⁴³ «اطلاعات», 25.II.1952.

նիվ, այս անգամ ևս վերահաս հեղաշրջումը հնարավոր եղավ կանխել՝ շնորհիվ շահի և նրա դաշնակիցների դեմ երկրի առաջադիմական ուժերի զանգվածային, հզոր դիմադրության:

Մոսադեղի ինքնուրույն գործունեության հնարավորությունը մեծ չափով սահմանափակում էր նաև կառավարությանն ընդդիմադիր մեջլիսը: 16-րդ գումարման մեջլիսում, որը Մոսադեղին հաստատեց պրեմիեր-մինիստրի՝ պաշտոնում, տիրապետում էր ռեակցիոն մեծամասնությունը⁴⁴, և Մոսադեղի կողմնակիցների թիվն ընդամենը ութն էր⁴⁵: Արտաքուստ պարագրեսային դիտվող այս ակտն առկա իրադրության մեջ միանգամայն ըմբռնելի էր. անգլո-իրանական նավթային ընկերության դեմ ծավալված համաժողովրդական շարժման թափը և նրա սպասելի հետևանքները, նաև Մոսադեղի լայն ժողովրդայնությունն ու նրա նկատմամբ եղած ջերմ համակրանքը երկրում ստեղծել էր այնպիսի մի մթնոլորտ, երբ մեջլիսի բացահայտ դիմադրությունը կարող էր հանգեցնել անցանկալի արդյունքների: Իշխանության արդեն իսկ ամենասկզբում, սակայն, մեջլիսի մեծամասնության օբստրուկցիոնիստական քաղաքականությունն այնպիսի չափեր ընդունեց, որ Մոսադեղի գործունեությունն, իրականում, անհնար էր դառնում⁴⁶:

Մոսադեղի հույսերը շարդարացրեց նաև 17-րդ գումարման մեջլիսը: Ամենակուպիտ ու բացահայտ կերպով միջամտելով ընտրությունների ընթացքին (ընտրություններն սկսվեցին 1952 թ. հունվարին)⁴⁷, Մոսադեղը ջանացել էր հնարավորին չափ շատ կողմնակիցներ ներգրավել մեջլիս, սակայն շատ շուտով այնտեղ ևս նրա դեմ օպոզիցիա էր ստեղծվել, և Մոսադեղի գրեթե բոլոր նախաձեռնությունները հանդիպում էին մեջլիսի դիմադրությանը: Օպոզիցիայի հակադեցությունն առավել սաստկացավ Մոսադեղի իշխանության երկրորդ փուլում, երբ նա ձեռնամուխ եղավ անհամեմատ առաջադեմ քաղաքականության: Մեջլիսում և սենատում լուրջ տարաձայնություններ առաջացրեց վեցամսյա արտակարգ լիազորություններ ստանձնելու Մոսադեղի խնդրանքը, որի նպատակը Իրանի ներքին կյանքում բարեփոխություններ անցկացնելու միջոցով երկիրը տնտեսական ճգնաժամից փրկելն էր⁴⁸: Եթե որոշ դեպուտատների դիմադրության պատճառը միմիայն անվստահությունն էր Մոսադեղի հնարավորությունների նկատմամբ և անհանգստությունը, որ նման նախադեպը կարող էր վատ օրինակ ծառայել գալիք կառավարությունների համար, ապա դեպուտատների ճնշող մեծամասնությունը Մոսադեղին արտակարգ լիազորություններ տրամադրելը հանդուգն ոտնձգություն էր համարում՝ սահմանադրության դեմ և բացահայտ սպառնալիք՝ մեջլիսի հետագա գոյությունը⁴⁹: Անբարյացակամորեն ընդունվեցին նաև ներքին կյանքի տարբեր

⁴⁴ D. J. Tavaloli, Le parlement Iranien, Lausanne, 1954, p. 146.

⁴⁵ Նույն տեղում:

⁴⁶ ملكى، تاريخچه جبهه ملی، تهران، ۱۳۳۴، ص. ۳۸.

⁴⁷ شمیم، ایران در دوره سلطنت اعلیحضرت محمد رضا شاه پهلوی،

تهران، ۱۳۴۵، ص. ۶۵.

⁴⁸ «اطلاعات»، 13.XII.1952.

⁴⁹ Մեջլիսում և սենատում Մոսադեղի վեցամսյա արտակարգ լիազորությունների պահանջը րենսարկման նյութերից՝ հրապարակված մամուլում:

բնագավառներում կառավարության գրեթե բոլոր բարեփոխական միջոցառումները: Սուր հակազդեցության տեղիք տվեցին ռազմական միևնույն պարտականությունները ստանձնելու Մոսադեղի պահանջը, ինչպես և շահի իշխանությունը սահմանափակելու նրա մյուս փորձերը: Բուռն տարաձայնությունների հանդիպեցին նաև Մոսադեղի արտաքին քաղաքականության շատ կողմերը: Այսպես, մեջլիսի դեպուտատների մի մասը դժգոհ էր Անդլիայի նկատմամբ Մոսադեղի դիրքորոշումից և, մասնավորապես, նախագիծ խնդրի վճարման Անգլիայի առաջարկած տարբերակները մերժելու հանգամանքից: Կառավարության նկատմամբ մեջլիսի թշնամական վերաբերմունքն այնքան ակնհայտ էր, որ «էթթլա» Կիսապաշտոնաթերթը դատապարտում էր մեջլիսի այն դեպուտատներին, «...ովքեր իրենց հարձակումներով ու վիրավորանքներով տարաձայնություններ են առաջացրել կառավարության և մեջլիսի միջև և խախտել նրանց միասնականությունը»: «Մեր կարծիքն այն է, — դրում էր թերթը, — որ դ-ր Մոսադեղի կառավարությանը պետք է օգնել, որ կարողանա դժվարությունները հաղթահարել: Երկրի այսօրվա վիճակն ավելի քան հերքել է կարիք ունի, որ կառավարությանը պաշտպանեն, աջակցեն և նրա հետ համագործակցեն...»⁵⁰: Մեջլիսում Մոսադեղի դրությունը հատկապես վատթարանում էր այն պատճառով, որ նրա հիմնական հենարանը՝ «Ազգային ճակատը», իր կազմի մեջ մտնող առանձին խմբավորումների և առանձին գործիչների միջև միասնականության բացակայության հետևանքով, փաստորեն, չորոհվել էր: Նպատակների էական տարբերությունների հետևանքով, որոնք առավելապես խորացել էին կառավարման երկրորդ փուլում, Մոսադեղից հեռացել և հակառակորդների կողմն էին անցել նրա նախկին համախոհների շատերը:

Արդեն 1953 թ. մամանը Մոսադեղի դեմ օպոզիցիան մեջլիսում այնպիսի չափեր էր ընդունել, որ համագործակցության և քիչ թե շատ նորմալ աշխատանքի հնարավորությունը միանգամայն բացառվում էր⁵¹: Այդ պատճառով էլ Մոսադեղը հուլիսի 25-ին դեկրետ հրապարակեց մեջլիսը հանրաքվեի միջոցով ցրելու մասին⁵²: «...Ժողովրդի կամքը, — հայտարարեց նա, — օրենքից վեր է»⁵³: Կառավարության հակառակորդները հանդես եկան հանրաքվեի դեմ: Վերահիշյալ միջոցառումը դիտելով հակասահմանադրական ակտ, մեջլիսի նախկին նախագահ, կրոնական գործիչ և Մոսադեղի երբեմնի դաշնակից Քաշանին կրոնական խիստ բոլկոտ հայտարարեց հանրաքվեին⁵⁴:

Չնայած օպոզիցիայի կատաղի դիմադրությանը, օգոստոսի 3-ին հանրաքվեն, այնուամենայնիվ, սկսեց անցկացվել⁵⁵: Օգոստոսի 10-ին հանրաքվեի արդյունքները հայտնի դարձան. մասնակիցների 99,93%-ը քվեարկել էր հօգուտ մեջլիսի արձակման⁵⁶: Մոսադեղի բացարձակ հաղթանակն էլ ավելի

⁵⁰ «اطلاعات», 1.XII.1952.

⁵¹ R. N. Frye, Iran, London, 1953, p. 107.

⁵² D. N. Wilber, Contemporary Iran, New York, 1963, p. 98.

⁵³ «باختار امرت», 27.VII.1953.

⁵⁴ «اطلاعات», 29.VII.1953.

⁵⁵ D. N. Wilber, նշվ. աշխ., էջ 99.

⁵⁶ „The Middle East Journal“, vol. 7, № 4, 1953, p. 510.

գրգռեց նրկրի հետադիմական շրջաններին և ավելի որոշ դարձրեց նրան ասպարեզից հեռացնելու վերջիններիս դիտավորությունը:

Օպոլիցիայի ոտնձգություններին դիմակայելու և իր քաղաքականությունն իրականացնելու համար Մոսադեզին վստահելի հենարան կարող էր ծառայել նրկրի դեմոկրատական ուժերի և, մասնավորապես, Իրանի ժողովրդական կուսակցության (ԻԺԿ) հետ համագործակցությունը, որը, սակայն, այդպես էլ, բացառությամբ առանձին փոքրաթիվ պահերի, չկայացավ: Դրա հիմնական պատճառը, թերևս, նրանց նկատմամբ Մոսադեզի երկակի դիրքորոշումն էր: Ներքին և արտաքին թշնամիների դեմ պայքարում ավելի քան հոժարությամբ ընդունելով դեմոկրատական ուժերի աջակցությունը, կառավարությունը, միաժամանակ, խուսափում էր նրանց հետ համագործակցելուց, ավելին, ջանում էր խոչընդոտել նրանց գործունեությունը: Բավական է հիշատակել, որ ազգային բուրժուազիայի իշխանության ողջ շրջանում ԻԺԿ-ն զրկված էր լեզալ գործելու հնարավորությունից: Միացյալ Նահանգները, որոնք հուլյսեր էին կապում Մոսադեզի կառավարության հետ, լավ էին պատկերացնում, թե ինչի կարող էր հանգեցնել նրա համագործակցությունն ԻԺԿ-ի հետ և բուրժուազիայի ներքին աշխատում էին կանխել այդպիսի մերձեցման հնարավորությունը:

Ազգային բուրժուազիայի կառավարության և Իրանի ժողովրդական կուսակցության հարաբերությունների վրա տարբեր ժամանակներում էական ազդեցություն են գործել նաև ԻԺԿ-ի քաղաքականության մեջ տեղ գտած որոշ սխալներ, որոնք հիմնականում հետևանք էին ազգային բուրժուազիայի էության և Իրանի հակաիմպերիալիստական պայքարում նրա տեղի ու դերի թյուր պատկերացման⁵⁷: Անկարող լինելով սահմանազատել «Ազգային ճակատի» տեսակետներով, նպատակներով, նաև քաղաքականությամբ միմյանցից էականորեն տարբերվող աջ և ձախ խմբավորումները, ԻԺԿ-ն երկար ժամանակ Մոսադեզին և նրա համախոհներին էր վերագրում «Ազգային ճակատի» աջ թևի պարագլուխների՝ Բադայիի, Մաքթիի և այլոց իրոք հակաժողովրդական, պրոռեակցիոն և պրոիմպերիալիստական գործունեությունը, իր մամուլի էջերում նրանց ներկայացնելով որպես իրանական ժողովրդի դավաճաններ և ամերիկյան լրտեսներ:

Մոսադեզի կառավարության ներքին քաղաքականությունն իրականացվում էր հօգուտ Իրանի ազգային բուրժուազիայի, նրա դասակարգային շահերի՝ հեռու լինելով որևէ ասպարեզում արմատական վերափոխության նպատակից: Այսուհանդերձ, մասնավորապես իշխանության երկրորդ փուլում (1952—1953 թթ.), Մոսադեզի ներքաղաքական գործունեությունը բավական խոստումնալից էր և նրա (թեկուզ սահմանափակ և թերի) բարեփոխական միջոցառումների և առաջադիմական այլ ձեռնարկումների կենսագործումը երաշխավորում էր տիրող վիճակի զգալի քարելավում: Այդ ձեռնարկումները, սակայն, հիմնականում մնացին անկատար, քանի որ Մոսադեզը, որպես իր դասակարգի իսկական ներկայացուցիչ, անընդունակ եղավ սկսած գործը հետևողականորեն ավարտել: Մոսադեզի անվճռականության հետևանքով այդ միջոցառումները գերակշռաբար ձեռնարկվեցին մեծագույն ուշացումով, բառացիորեն կառավարության տապալման նախօրեին, որը և բացառեց դրանց իրականացման հնարավորությունը: Մոսադեզի առաջադիմական միջոցա-

⁵⁷ «دنیا»، سال پنجم، شماره سوم، ۱۳۳۳، ص. ۲۱۵.

ռումների իրագործումը գրեթե անկարելի դարձավ նաև այն պատճառով, որ դրանք մշտապես բախվում էին տեղական հակահառավարական շրջանների և նրանց հովանավոր ու աջակից ամերիկյան իմպերիալիզմի ամենախիստ հակազդեցությանը։ Արդեն իսկ իր կոչումով ազգային բուրժուազիայի կառավարության ներքին քաղաքականությունը, անշուշտ, անկարող էր որևէ շահով գոհացնել ժողովրդական լայն զանգվածների սպասելիքները և պահպանել Մոսադեղին աջակցելու նրանց նախկին պատրաստակամությունը։ Բոլոր այս հանգամանքները ի վերջո նպաստեցին Մոսադեղի կառավարության տապալմանը։

ВНУТРЕННЯЯ ПОЛИТИКА ПРАВИТЕЛЬСТВА НАЦИОНАЛЬНОЙ БУРЖУАЗИИ ИРАНА (1952—1953 гг.)

АНУШ СТАМБОЛЦЯН

Резюме

Период правления правительства национальной буржуазии Ирана (1951—1953) является одним из важнейших этапов национально-освободительного движения иранского народа в послевоенные годы.

Определенный интерес представляет исследование внутренней политики правительства, которая стала более интенсивной и многосторонней в результате некоторых обстоятельств на втором этапе правления (1952—1953). Усилия правительства в этот период были направлены на обеспечение необходимых условий для независимой и самостоятельной деятельности.

Реформы и мероприятия правительства в основном проводились с позиций ограниченных классовых интересов иранской национальной буржуазии и далеко не претендовали на коренные преобразования в какой-либо отрасли. Однако их осуществление гарантировало хотя бы частичное улучшение существующего положения.